

MUKADIMAH JUNJUNG KASIH 2022

Assalamualaikum Warahmatullahi Wabarakatuh

Bismillahir Rahman Nir Rahim

Alhamdulillahilahi Rabbil Alamin, Wassalatu Wassalamuala Ashrafil Anbiyai Walmursalin

Waala Alihi Wassohbihi Ajamain

Yang Berhormat, Yang Di-Pertua dan Ahli-Ahli Yang Berhormat yang di rahmati Allah.

Terima kasih Yang Di-Pertua kerana memberi peluang kaola untuk menyampaikan sembah menjunjung kasih walaupun tidak dapat bersama secara fizikal pada waktu ini.

Terlebih dahulu sukacita kaola dengan penuh hormat dan takzim menyokong usul yang dicadangkan oleh Yang Berhormat Penasihat Khas Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam dan Menteri di Jabatan Perdana Menteri pada menyembahkan menjunjung kasih yang setinggi-tingginya Kehadapan Majlis Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzuddin Waddaulah ibni Al-Marhum Sultan Haji Omar Ali Saifuddien, Sa'adul Khairi Waddien, Sultan dan Yang Di-Pertuan Negara Brunei Darussalam, atas keberangkatan bercemar Duli dan pengurniaan titah semasa Majlis Istiadat Pembukaan Rasmi Mesyuarat Pertama dari Musim Permesyuaratan Ke Lapan Belas Majlis Mesyuarat Negara, pada hari Khamis, 23 Rejab 1443H bersamaan dengan 24 Februari 2022M.

Titah Baginda sangat jelas memberi ingatan kepada kita semua bahawa persediaan ke arah mencapai Wawasan Brunei 2035 yang hanya tinggal kira-kira 13 tahun saja lagi, perlu dirancang dengan rapi dan seawalnya, untuk memastikan segala apa jua rancangan dapat dilaksanakan dengan teratur dan berjalan lancar.

Penyediaan dan perlaksanaan infrastruktur di negara ini adalah menjadi tanggungjawab Kementerian Pembangunan yang mana telah pun banyak dilaksanakan dibawah projek yang dirancang di dalam Rancangan Kemajuan Negara. Ini membuktikan pihak Kerajaan

MUKADIMAH JUNJUNG KASIH 2022

Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam terus komited ke arah pembangunan infrasktruktur di negara ini. Ianya telah memberi impak yang besar bukan saja dalam menaik taraf kehidupan rakyat dan penduduk di negara ini malahan juga sebagai pemangkin kepada pertumbuhan ekonomi, menarik pelabur-pelabur asing untuk melabur di negara ini.

Semua ini adalah untuk memastikan kemakmuran dan kesejahteraan rakyat dan negara sentiasa berterusan dan terjamin.

Penyediaan peta jalan (*roadmap*) bagi projek-projek yang perlu dimasukkan di dalam Rancangan Kemajuan Negara Ke-12 seperti yang disentuh di dalam titah Kebawah Duli Yang Maha Mulia Paduka Seri Baginda Sultan Dan Yang Di-Pertuan Negara Brunei Darussalam adalah satu kaedah *whole of nation approach* dalam memastikan wawasan Negara 2035 tercapai.

Kementerian Pembangunan akan sentiasa bersedia berkhidmat dalam mendokong pelaksanaan strategik setiap kementerian dan jabatan yang berkenaan dalam penyediaan pembangunan infrastruktur dan insya-Allah akan sentiasa memastikan ianya dilaksanakan mengikut keutamaan, keperluan dan pemantauan yang rapi mengikut jadual yang ditetapkan.

Disamping itu juga Kementerian Pembangunan menjunjung tinggi titah Baginda mengenai dengan penekanan Baginda dalam perbelanjaan kewangan negara hendaklah dibuat secara berhemah dan berdisiplin dengan mematuhi peraturan-peraturan kewangan yang ada dan tidak menggunakan kuasa untuk berbelanja sewenang-wenangnya serta mengikut keutamaan, keperluan, tidak membazir dan dilaksanakan dengan teratur. Titah Baginda ini akan sentiasa menjadi panduan dan ingatan bagi Kementerian Pembangunan dan Jabatan-Jabatan dibawahnya dalam melaksanakan apa jua projek dibawah kementerian ini. Insya Allah, pihak Kementerian Pembangunan akan terus berusaha bagi memastikan peruntukkan yang diberikan adalah mengikut

MUKADIMAH JUNJUNG KASIH 2022

keutamaan kementerian dan selaras dengan Pelan Strategik Kementerian Pembangunan 2018-2023. Pihak kementerian juga akan sentiasa merebui dan meneliti semula mana-mana perkhidmatan yang perlu penambahbaikan agar ianya bertepatan dengan keperluan dan ekspektasi orang ramai.

Pada hakikatnya, dalam melaksanakan projek-projek pembangunan infrastruktur ini, tidak semua yang dapat dilaksanakan mengikut apa yang dirancang kerana banyak halangan dan cabaran yang perlu dihadapi. Tetapi melalui pengalaman serta mengambil pengajaran dari projek-projek yang telah dilaksanakan, ianya tidak akan menghalang bagi kita untuk meneruskan apa-apa jua rancangan pelaksanaan projek-projek yang mana dapat menjamin kesejahteraan rakyat dan penduduk negara ini. Inilah masanya untuk kita mengemaskan apa yang belum kemas dan menambahbaik apa yang perlu diperbaiki seperti yang disentuh di dalam titah Baginda semalam. Kementerian Pembangunan sentiasa mempunyai minda yang terbuka dan menerima apa jua cadangan-cadangan yang dikemukakan oleh Ahli-Ahli Yang Berhormat dan jua daripada orang ramai.

Akhir sekali, kaola ingin menyembahkan sekali lagi setinggi-tinggi menjunjung kasih Kehadapan Majlis Kebawah Duli Yang Maha Mulia Paduka Seri Baginda Sultan Dan Yang Di-Pertuan Negara Brunei Darussalam atas limpah kurnia titah Baginda. Marilah kita sama-sama berdoa semoga segala apa jua usaha yang kita rancang dan laksanakan akan sentiasa mendapat rahmat dan pertolongan dari Allah SWT jua.

Sekian, Wabillahi Taufik Walhidayah Wassalamu Alaikum Warahmatullahi Wabarakatuh.

Terima Kasih Yang Berhormat Yang Di-Pertua.